

茶歌小引



余紫華相如三渴而喜啜茗  
常令蒼頭遠汲惠瀝燎枯烹  
滄時究鴻漸茶經按而為之  
遂讀六羨歌故耳漫搜唐宋

明聞心茶詠次序合廣匏菴  
霞茶鴻漸元羨韜玉採茶糸  
文鬪茶夢得試茶升菴月團  
茶五川惠茶東坡窵茶飛卿  
煮茶皎然飲茶崔珣嘗茶計

十一歌余汲韜玉韻作啜茶  
并汲韻成卷乃知所產羨惠  
窵烹益澹少補鴻漸所遺巨  
醉茶居士周履靖書



茶歌目錄

愛茶歌

六羨歌

採茶歌

鬪茶歌

試茶歌

月團茶歌

惠茶歌

煎茶歌

煮茶歌

飲茶歌

嘗茶歌

啜茶歌

附

賦

茶賦

茗賦

茶竈賦

泉甕賦

火箸賦

獸炭賦

五言古

酬友寄惠泉

煮茶聲

七言古

掃雪烹茶

五言律

烹茗

虎丘烹茶

山僧惠茶

酬沈山人惠新茶

山房蘭畔啜新茗

汲幽澗泉餉少岳

茶鼎

七言律

採茶

採天池茶

汲惠山泉

清夜煮茶

茶烟

過雨肥堂試新茗

五言絕

茶竈

泉甕

七言絕

烹茶鶴避烟

茶壺

茶甌

火筋

炭

贊

茶癖贊

銘

茶銘

紫竹茶爐銘

茶壺銘

砂茶壺銘

茶甌銘

茶碾銘

炭銘

詞餘

煮茗繙書

調黃鸞兒四曲

補遺

七言絕

掃葉烹茶

香茶餅

詩餘

詠熟水

調臨江仙

飲熟水

調臨江仙



茶歌

愛茶歌次明吳寬韻

醉里螺冠子周履靖著

山人嗜茶如嗜酒恣取清泉烹幾斗花間茶竈  
屢相親松邊帶月敲茶臼茶烟裊裊何時停茶  
味清甘香滿口榮辱無心總不驚惟與茶甌爲  
契友東風吹處春二三黃葉飄時秋八九四時  
愛茶樂有餘終日茶經不離手園中茶樹栽百

株戶下秫田無半畝年來欲傍玉川居兩腋清  
風你何有

原韻

湯君愛茶如愛酒不數三升并五斗先春堂開  
無長物只將茶竈連茶臼堂中無事常煮茶終  
日茶杯不離口當筵侍立惟茶童入門來謁惟  
茶友謝茶有詩學盧仝煎茶有賦擬黃九茶經  
讀篇不借人茶譜補遺將脫手平生種茶不辦

闔茶味今輕醜醜鬪茶香今薄蘭芷  
胡能欺十目視而十手指勝若登仙  
同降將無窮耻吁嗟天產石上英  
前莫衆人濁今我獨清千人醉今  
試與招魂魄劉伶却得聞雷霆盧  
羽湏作經森然萬象中焉知無茶  
休茹芝首陽先生休採薇長安  
都藥市無光輝不如仙山一啜

風飛君莫羨花間女郎只聞草

歸

試茶歌次唐劉禹錫韻

春深茶圃葉滿叢千樹萬樹俱蒙

勃然起摘取枝頭鸚鵡嘴呼童乞

鼎旋炊惠泉水故人却從何處來

徘徊相將漫啜五七碗臨風長嘯襟

晴春好天氣共客漫跌芳草地掌中

身貪飲不爲耻嗚呼上天產茶英不比堯庭一

葉糞啜一口今肺腑清啜二口今宿酒醒茶竈

烟疑似雲霧石鼎湯沸如雷霆君謨製茶譜鴻

漸著茶經嗜飲既成癖兩髻任星星何須更覓

蘭與芝武夷山中多薜薇至人但識此中味蒙

山頽渚皆增輝枯腸欲潤需滿碗飄然直欲凌

空飛君莫羨金谷園中花下酌何如摘茗踏雲

歸



原韻

年年春自東南來建溪先暖水微開溪邊奇花  
冠天下武夷仙人從古栽新雷昨夜發何處家  
家嬉咲穿雲去露芽錯落一番榮綴玉含珠散  
嘉樹終朝采掇未盈檐惟求精粹不敢貪研膏  
焙乳有雅製方中圭今圓中蟾北苑將期獻天  
子林下雄豪先鬪美鼎磨雲外首山銅瓶携江  
上中泠水黃金碾畔綠雲飛碧玉甌中翠濤起

原韻

靈山惟嶽奇產所鍾厥生茗草彌谷被崗承豐  
壤之滋潤受甘霖之霄降月惟初秋農功少休  
結偶同旅是采是求水則岷方之注挹彼清流  
器澤陶簡出自東隅酌之以匏取式公劉惟茲  
初成沫沉華浮煥如積雪曄若春敷

茶竈賦

取庾嶺之紫土剖蔣徑之綠筠做龜蒙之竈式

擬玉川之爐形倩哲匠之妙伎趨高人之幽情  
肖像而欲朴古製狀而用竒新腹欲虛而堪容  
獸炭口欲敞而可配瓦鐺汲惠山之泉碧採虎  
丘之茗精燒文武之火燎松栢之薪煮水起蟹  
眼魚泡之狀焚火發竹韻松濤之聲滌盧君之  
茗碗緡陸子之茶經良宵而可動虛室而可陳  
烹之一鼎可濯塵心啜之幾甌得清詩竟渴思  
頃解俗慮頓分可貽逸士堪贈高僧賞山中之

雅况快林下之閒心賦一時之佳句流千載之  
清名

泉甕賦

腹虛而堪容物質堅以圓爲式能資世俗之用  
匪求悅目之色畢卓卧之於傍陶侃運之不息  
貯醪於杜康家爲牖於原憲室宜感滄茗山泉  
可貯浮白玉液虛而必至其充滿而須戒其溢

火箸賦

器雖至微胡可棄捐受形而直稟性而堅擅於  
司火志於凌烟交脛而動並質而牽於是寒冬  
慘慄雪夜未央烏薪將熾朱火乏光資以夾輔  
助以熒煌藉爾焰發仗爾威張動無捨一止則  
成雙銳其末而去其利端其本而秉其剛撥死  
灰而未冷待活火而銷亡

獸炭賦

獸形而始羊琇鳳狀而起國忠稱烏銀而重並

玉質而同出洪爐而色黑遇烈火而體紅一炬  
而熾萬車而雄能消朔雪不畏冽風煮茶而燃  
小鼎辟寒而燎嚴冬豫讓而吞皇后而烘

五言古

酬友寄惠泉

孤艇艤溪邊言從慧麓還憐余司馬渴碧甕寄  
澄泉紫缶淪青茗竹爐炊松烟甘冽滌塵慮弗  
使煩勞牽感君意何厚媿我心相懸清風滿虛

齊逸思俱泮然貯之白玉壺細吸味還偏余性  
頗耽嗜自謂勝玉川須教吸一壺遂得玄中玄  
煮茶聲  
扁舟陽羨歸摘得雨前肥漫汲惠泉水松枝火  
用微香從几上繞烟向樹頭圍渾似松濤激還  
疑綠綺揮蜂鳴聲彷彿澗水響依稀

七言古

掃雪烹茶

昨夜狂風起林麓朝來積雪渾如玉柴門蕭索  
冷無踪高卧何人閉茅屋野夫病渴心未寧西  
隣覓火炊砂鑊分得仙茶自陽羨爲烹雪水心  
彌清胸中礪硯盡驅逐主人此時意頗足潺潺  
泉響蟹眼生旗鎗騰沸茶初熟誰言陸羽著茶  
經玉川先生嗜好督一盞聊爲散俗氛却教肢  
躄無拘束

五言律

烹茗

新茶烹活火珠箔控銀鈎香氣凝孤牖清光霽  
浦甌將軍醒午夢司馬潤詩喉獨鶴歸何處烟  
消月滿樓

虎丘烹茶

生公會說法巨石鑑光平佳茗泉分碧芳池水  
自清一樽臨澗曲雙燕拂筵輕歸去天將暝松  
頭聽鳥聲

山僧惠茶

僧來天目寺貽得雨前茶水汲龍淵派香分雀  
舌芽惠余留竹几宜爾近山家若向幽窓煮凡  
情頃已賒

酬沈山人惠新茶

乍驚貽綠茗宿酒藉君醒自有龜蒙竈寧無鴻  
漸經一詩何以報七碗未須停好滌胸中垢條  
然養性靈

山房蘭畔啜新茗

嫩葉雨前摘山齋和月烹泉聲雲外響蟹眼出  
中生已得盧仝興聊追陸羽情幽香逐蘭畹清  
氣霽軒楹

汲幽瀾泉餉少岳

玉泉通巨海不向石中生色湛如瓊液光寒似  
水晶水壺還共潔茗盃最宜清好寄林中叟應  
憐交誼情

茶鼎

有耳原非鼎臆虛堪貯泉寒灰撥未盡枌杪已  
含烟聲是湯中沸鶴憐漢外翩生平善茶癖幾  
向月中煎

七言律

採茶

月團三百未須誇細品茶經陽羨嘉春暖武夷  
萌古榦雨晴顧渚長新芽携筐度嶺羅衣冷捫

葛穿雲蠟展賒漫汲惠泉砂鼎煮蟹睛魚目泡  
生花

採天池茶

草履穿雲上石巔飄然迢遞觸朝烟未從陽羨  
攀春早且向天池摘雨前新榦半含嵐氣濕嫩  
芽猶帶露華鮮歸來擊竹分泉煮一碗傾來效

玉川

汲惠山泉

歷覽靈源入品評惠山不易二泉名汲來滿甕  
金莖露瀉出盈甌玉乳精湛湛澄淵涵石髓溶  
溶白雪滌塵情一瓢自飲松林下渴吻全消詩  
思生

清夜煮茶

霽色如銀瑩碧紗梅葩影裡月痕斜家僮乞火  
焚枯葉石甕分泉煮嫩茶頓使山人清逸思俄  
驚蠟炬發新花幽情不減盧仝典兩腋風生渴

茶歌  
思賒

茶烟

慢逐涼颺度絳帷又從爐篆裊低相暮籠繡枕  
象牙榻曉颺風簷蛛網絲松鶴好教飛遠漢午  
窻正及夢回時試烹深投廬公奧品味應傳陸  
子知

過吳伯度雨肥堂試新茗

知君乘輿虎丘歸爲摘靈芽入翠微石甕載

山下碧竹筐藏得雨前肥童分活火鑪中煮鶴  
避蒼烟檻外飛爭道廬仝抱茶癖當年此味也  
應稀

五言絕

茶竈

松風起夜涼呼童燃楚竹四壁激濤聲明月照  
茅屋

泉甕



質本黃砂就成功藉濱陶會同畢卓卧運水匪  
云勞

七言絕

烹茶鶴避烟

山僧惠麓汲澄泉石鼎松枝月下燃信知海鶴  
非凡骨林杪迴翔不染烟

茶壺

紫泥爲質不須砂哲匠龔春製法嘉甯小腹寬

能着水煮茶消渴亦堪誇

茶甌

白砂細碾作坯胎本出江西俠客來付與盧仝  
堪啜茗相如渴思頃能回

火筋

質本鋼成肖箸形撥灰剔火爾偏能燒丹煮茗  
虛齋內一任提携力不停

炭

洪爐煨木變烏金石鼎烹茶代作薪愛爾焚身  
全不惜隆冬凜冽可回春

贊

茶癖贊

素性偏僻嗜茗若璧不親麪生嬾近歡伯竹爐  
燎松砂鑄泉碧自淪自烹坦襟岬幘七碗恣嘗  
不款俗客啜之不已世號茶癖千秋萬世盧陸  
可匹

銘

茶銘 三言

生陽羨產顧渚仲春吐雨前取惠山泉堪相遇  
紫竹爐列靜宇磁碗傾砂鑄煮燎蒼松焚桂樹  
發煌光起烟霧室氤氳鶴難任味雖甘性本苦  
離於火水壺注啜玉碗爽襟度抗瓊漿勝玉乳  
滌詩腸清臍腑宿醞醒奇句吐講玄談揮玉麈  
相如渴頃得愈閭巷夫徒企慕伴盧仝友陸羽

著成經紀爲譜螺冠子堪爲侶

紫竹茶爐銘 四言

渭川紫管何須去節遇之良工用之以篋配以  
紫泥製爲爐列

茶壺銘 四言

腹既能容口亦能瀉濟人之渴爾稱先者

砂茶壺銘 四言

丹堊之砂匠工之嘉製之成器淪茗烹茶

茶甌銘 三言

虛則受盈則溢貯春茗堪供客

茶碾銘 三言

玉腕運慢旋迴常不礙動無違月團破香露霏  
青鏡轉綠塵飛

炭銘

搏視塑鳳價重烏銀却寒生煖豫讓而吞

詞餘

煮茗繙書

詞黃鶯兒四曲

盡日把門扃向松窓展六經從來足學希顏孟  
塵心頓清玄机漸明研穷妙理安心境話平生  
浩歌長嘯誰識屈原醒

視典苦勞形檢邕書得論衡松枝時取燃茶鼎  
烟飄鶴驚炙書汁青須傾七碗盧仝茗夜無燈  
校書酌史車胤一囊螢

柳嘯幾黃鶯悶凭欄靜裏听間閔已助幽人興  
汲水在瓶烹茶在鑪繞屋松風聲沸鼎賦長檠  
吟成佳句窓外鬼神驚

落日下空庭貫村醪煮菜羹舉杯邀月添詩興  
窮經義精講學道明那看尚友超凡等學逃名  
隱居獨善養志爲忘形

補遺

掃葉烹茶

颯颯疎林風作寒飄零殘葉委苔端朝來試掃

供茶竈碧澗分泉煮月團

香茶餅

漫將龍腦配沉檀研作香塵和麝蘭金盞密勻  
銀杵搗生津消渴勝還丹

詠熟水

調臨江仙次宋易少夫人韻

新汲溪流烹石鼎須知蟹眼傾甌相看瑩潔似  
冰清會須陽羨茗頻啜莫教停不必問玉川  
煎法何須去學養茶應知一味可人情漫吞五

六碗兩腋御風輕

原韻

何處甘泉來席上嫩黃初湯銀甌月團嘗罷有  
餘清惠山名品在歌舞暫留停欲賞壑源新  
氣味不應無進稀茶此中端有淡交情相如方  
病酒一飲骨毛輕

飲熟水話別

調臨江仙次宋易少夫人韻

共飲花間酣欲去且將茗碗相携回車分付列

旌旗忽聽銅壺滴玉兔影旋低  
別情繾綣心  
難捨此行步履應遲俄驚分手又東西  
萬花叢  
裡客明日盡皆非

原韻

記得高堂同飲散一杯湯罷分携絳紗籠影簇  
行旗更殘銀漏急天淡玉繩低  
只恐曲終人  
不見歌聲且爲遲遲如今車馬各東西  
畫堂携  
手處疑夢又疑非  
茶歌終

螺冠子酒詠

醉里螺冠子周履靖著

四言古

勸酒 四首

幽窓之下有詩有琴一彈一咏樂我天真寡嗜  
無契惟喜滿斟醉觀蝶栩栩寤聽鳴禽  
旨酒在手明月在堂開襟獨酌身世兩忘珮趨  
玉闕何如醉鄉賢愚同盡嗟彼北邙

忽憶芳春與酒相親黃鳥爲友絳桃爲隣俄然  
轉眼花落成茵時光易邁寒暑催人  
腴田千頃何如一杯清秋翫菊春隴觀梅日月  
如矢旦暮相催君能意度萬事俱灰

月村謳飲次明顧可久韻

明蟾耿耿照彼東臯爰命樽俎思逸氣豪肴核  
既薦壺傾香醪吹笙鼓瑟旋舞運翻謳歌淒楚  
其聲如號鬢雖堆雪興若兒曹當此佳辰心暢

情陶

獨飲次明薛應旂韻

蕭蕭朔風霏霏密霰閉戶靜處白日已晏嗟彼  
霜髭云何忘倦飛鳥知還豈不思羨老不復少  
水不西轉獨飲獨樂千愁頓遣

秋夜獨酌

秋臨暑退氣爽神融穿窓皓月拂戶涼風喜而  
呼酒盤煮青菘邀月對飲豁其心胸不覺半酣

詩思頗濃啣杯搜句滌硯呼僮頃就古調意暢  
情冲酒盡興畢入於房櫳一枕高卧林梢日紅  
莫問工拙山澤老農

秋日雜言 四首

衡茅憇足獨對南軒白雲停牖靖思條然有酒  
盈樽無客扣門聊成短句得意忘言

秋雲靄靄秋雨霏霏泥途多畏迹荆扉新藟  
既熟鱸魚正肥把菊獨酌醉來息機

新秋月朗印我虛楹樽浮綠醕菜煮清羹臨軒  
寄傲聊舒俗情恍然醅醕斗柄初橫

颯颯涼颼吹我二毛空齋澄寂興俠詩豪杯擎  
醴醑飲待月高渾忘宇宙其樂陶陶

答龐參軍六首次晉陶潛韻

興來斟酒醉餘枕書復醉復卧任我歡娛意忘  
塵想日憩山居風飄竹牖月滿茅廬

抱道守朴握此奇珍心期晤對日欲相親金蘭



永結獨羨斯人志同道契德必有鄰  
風姿懸隔企慕孜孜新莠清冽可共斟之期酣  
午夜秉燭賡詩別悰既久豈不爾思  
良晤未稽何期袂分舉杯岐路顏色不欣悠悠  
漢水漠漠溪雲眷此嘉話胡能得聞  
夫人云別綠綺不鳴把盞淒其朋好飄零江干  
一晤遙憶神京寄音鴻雁喜聞安寧

送君折柳揚帆隨風愁生我懷併蓄於中歸期

有日思君無終加餐省何處乘去第

酬丁柴桑二首次晉陶潛韻

村酒可斟茅茨可止意若紉蘭心馳萬里何爲  
莫逆謹終於始

金蘭相契交本有由對君一晤燭我隱憂如膠  
投漆何時乃沐浴沂詠歸春日斯遊

遊鴛湖四首次明陳繼儒韻

扁舟似葉棹破清流荷擎水面鴛宿磯頭

歌聲混笛吸酒如泉狂客無羈醉倒沙邊  
蘆汀烟暝水底月生酒徒長嘯鷗鳥莫驚  
狂呼綠酒我懷既雄徜徉世外得追古風

五言古

飲酒詩二十首次晉陶潛韻

余酒無陶公之量而多陶公之興閒居  
寥廓時命村醪朗味陶公飲酒詩情  
甚愜然遂捉筆倚韻而成使麴生亦

知余之鑒賞哉

得失信無定情悰徒憾之秋風摧落木空憶芳  
春時春秋易來去幻質亦若茲智者能自解取  
樂莫狐疑花前與月下杯酒須盈持

生平一無好所志在青山雲停疑絕巖鳥語訝  
人言飫蕨衣蘿薜瀟然得忘年但全巖穴志微  
名何足傳

人皆戀冠蓋誰適世外情惟願樽中滿何須海

內名聊以謝塵雜醉鄉過此生朝來臨寶鏡倏  
忽霜鬢驚徒延良歲月悵悵一無成  
堪羨華亭鶴奮翅青霄飛一聲徹九臯不學秋  
鴻悲遨遊滄海遍暮向松樹依日隨鸞鳳翻月  
明方始歸徘徊任來去千載翼不衰我欲跨鶴  
背逍遙與世違

自識閒中味何煩厭囂喧寸衷滌塵滓方與世  
情偏一杯堪寄傲猶勝躡青山騷人與酒伴朝

夕相往還已適林泉致不向俗人言

人世惡人非未知誰者是我儕識是非任譽任  
相毀局促百歲內莫計我與爾靜觀塵中人何  
能壽至綺

梅持歲寒操嚴冬發奇英契彼冰雪姿翫此忘  
俗情悠然動佳興一樽花底傾夕陽下西嶺歸  
鴉林端鳴優游茆茨間詩酒了餘生

黃菊綻東籬傲霜逞幽姿羨此怡情物欣欣折

其枝翫對若有興孤游世所竒狂歌百壺罄醉  
去一何爲心遠志自曠豈爲俗情羈

寒山積殘雪疎梅的皜開稚子持松醪滿斟愜  
我懷心共花酒契情與世事乖肥遁郊墟間優  
游成閒栖懶躡紅塵跡何妨醉似泥興高眷幽  
獨喧囂不相諧山水敦夙好情適意無迷且罄  
樽中物青春去不回

志抱烟霞癖結廬傍山隅操觚拂塵塵飄然脫  
迷途但與杯酒洽不爲利祿驅人生達天命自  
覺樂有餘塵世徒勞勞無如嘯壑居

陶公稱達哉言言皆見道折腰志豈甘與酒相  
諧老四海流清聲雖死名不槁遺說竟何爲人  
生樂更好不惜有限春惟嗜世上寶殘軀伴土  
壤勤勞有誰表

彭澤栽五柳詩酒重當時掛冠卧柴桑賦就歸  
來辭高風振千載芳聲猶在茲超然塵世外安

命復何疑斯人著青史昭昭弗我欺至今靖節  
名無日不頌之

把酒幽懷舒樽前有佳境契彼每忘情十旬九  
不醒出言各一途斯意誰能領高情寄糟丘此  
身猶脫穎不獨醉花間長夜有燭炳

明蟾照我懷山妻携酒至花下謾盤桓暢飲倏  
爾醉猖狂不知疲歲月忘序次萬物捲歸虛此  
身誠可貴生平一無爲獨樂杯中味

與世多相違蕭然卧頽宅蒿萊蔽行蹤門靜寡  
車跡徜徉天地間五十可抵百行樂湏及時莫  
待雙鬢白良辰不成歡老至誠堪惜

常諳酒德頌不識史與經床頭儲宿醞逸興斯  
可成開樽酣永晝秉燭醉深更明月適我趣清  
光流空庭弗問玉漏促還待曉鐘鳴頽然隱靜  
几誰解此中情

乘閒坐松下携樽面涼風蟬聲聒兩耳月色盈

杯中但酬此夕興何計窮與通高鳥任來去不  
必彈勁弓

生平孰濁醪真樂閒中得性本厭喧囂卜居志  
不惑蕭然岩穴下時將兌門塞日與鹿豕游無  
意于京國闔戶踞胡床玄修惟默默

醉鄉盡日歡何羨身登仕盤桓泉石間是非不  
干已試觀辱與榮安貧斯遠耻寂寂守家風條  
然棲故里興來啣酒杯詩就集成紀塵事總紛

紘還當識知止恬愉性所安浮名胡足恃

寄身宇宙間達者知匪真羲皇去我遠澆薄銷  
其淳山川仍似昔田園幾見新伯圖每更易倏  
忽項滅秦咸陽三月火阿房已成塵萬事固有  
定浮生徒辛勤頃爾老大至海內誰相親雙鬢  
侵白雪形衰竭玄津陶公能解道漉酒卸葛巾  
欣然傾壺觴醉臉笑醒人

酒會詩次晉嵇康韻

徐步芳園中肆覽歡無已綠柳間紅桃燦燦花  
叢踣方池泛藻萍潑潑躍赤鯉馴鶴啄松根兒  
童釣鱸鮪狂歌與浮白叔夜共其軌綠水曲聲  
清佳音吐皓齒席地聲芳樽長嘯風前起此興  
有誰同不堪語俗子世間榮達人未必終其始  
杯酒樂無窮素心見知已

飲酒詩十六首次唐白居易韻

白香山天性慧達掛冠早歸日惟把酒

哦咏與晉處士冥契吐辭似陶意趣  
余暇朗哦聊追幽悰倚韻愧無晉唐  
之妙含愧無任

無量者世事莫測之昊天易過者歲月不竭者  
長川歡樂能有幾浮生無百年人爲萬物靈斯  
心當皎然曉來陞天衢薄暮歸幽泉功名草上  
露富貴等雲烟古來放達者竹林隱七賢芳名  
流宇內形迹去弗還我生成酒癖痛飲情何遷

終日懶出戶盤桓詩酒間或歌明月下或醉名  
花前林泉恣吟嘯杯酒恒交歡

夜半東風狂朝來瀟瀟雨浥彼枝上花潤我桑  
柘土涼飈入松窓滴瀝鳴山宇兒童垂竹簾園  
丁鋤後圃泥塗阻軒車閒寂無朋侶胷次自悠  
然開樽闔蓬戶鷄聲聞隔隣漁笛知何處一杯  
咏一詩恍對劉伶語

幻質暴皮囊終歸於大化悟徹此中機悠然北

窓卧喜歌飲酒詩懶聽風塵話忽遇好懷開持  
杯花下坐一盃復一盃樂此良辰暇飲至五斗  
餘興狂何肯罷醉眠芳草中不知晝與夜靜想  
無所爲幽棲寄茆舍陶情樽俎間餘生倏忽過

通宵淫雨驟行旅途路悲亭榭花含泪簷櫓收  
蛛絲東郊遊俠子泥滓成嗟谷林麓兩畦豈搖  
落摧爲萑匪獨人變更天道亦難期山齋晝陰  
陰飲酒適當時醉歌陽春調蒲引琥珀脂逸興



賴爾發詩腸澁藉滋一杯暢我思數盞舒雙眉  
飲至八九盞已覺柔四肢醅醕宇宙間任彼議  
我非耳畔咨咀語醉後恣不知風塵名利客翻  
令醉翁嗤

卯飲不至酣夜酌弗及睡對酒開我懷何須博  
大醉但識追其歡探討酒中致喜則傾一壺與  
來加三四少適眼前情已卻塵中事不啻俗人  
非自喜蠲其累擾擾何足論身閒可抵貴縱飲

忽成癡却與世人異寄語急者知莫把精神

費

萬里掃浮雲蒼宇絕點塵秋水共一色海底現  
水輪天澄氣斯朗皎潔惟中甸對景堪爲歡縱  
飲不至昏醉來得好句興高倒清樽對月發長  
嘯共影成三人所嗜詩與酒存心朴且淳自嫌  
真懶癖遇事苦不勤泠泠秋露下浥我頭上巾  
放達事杯酒朝夕惟此君但知酒中興弗期後  
世聞醞醖爲佳友青山是比隣一朝身命殞何

者爲相親

長空昇皎月清光滿東軒桂樹影婆娑窓虛助  
人歡欣然坐中夜貫酒不用錢興欲追嵇阮詩  
廣白與元吾性成疎散游心詩酒間詩可陶情  
性酒可適暮年但識此中趣何必求神仙劉伶  
頌其德世世稱名言心與古人契與酒信有緣  
不妨時俗議彼此各一天但能日日醉倒卧名  
花前

牀頭儲宿醞不必前村沽遇酒弗醉飲人生能  
幾何開樽松牖下明月弄影佳嘹嘹一大吠門  
外有客過促膝叙間濶對酒情更多老大不爲  
樂空嗟眼前花但成此夕興何妨斗柄斜惟願  
日醉酒豈羨榮與華佳客賞我懷當筵發浩歌

回也何敢慕食飲瓢與簞種芋可飽腹紉蘿乃  
禦寒德行匪能及屢空若前賢苟得聞其道貧  
餒亦自安無求情斯愜知止身得閒栽梅三百

樹居處屋兩間醉躡溪邊徑閒煮碧澗泉狂來  
松下嘯倦向花底眠寰區多懊惱身外別有天  
幽棲遠塵囂而無人跡喧明月照尊壘清影浮  
東山徘徊不忍去旨酒列我前怡情詩共酒樂  
志在郊原

矯矯幕下士結髮從征伐未得樹奇功逝矣復  
誰說臨陣冒鋒鏑驅馳驟騎卒旌旄蔽長空衆  
心秉歸一英雄奮威武赫奕呼咆嘯征袍染血

腥原野堆白骨不得流聲名徒費茲歲月當此  
好良宵舉杯莫停歇人生類草莽終歸同朽物  
堪嗟碌碌者知得未知失善惡似鑑明日月如  
矢疾俄然入鬼錄行樂終無日百味以酒先自  
識難爲匹

生本無所嗜逸志在滄洲幽蹤絕塵市闔戶惟  
潛脩心喜忘愛憎於世何營求百年駒過隙一  
身等蜉蝣滔滔黃河水東逝無復留生死在瞬

息徒勞千載憂何如漢長卿得興醉壚頭又羨  
白香山新詩日賡酬當年追勝賞後世垂芳休  
余多詩酒癖將來並存不古今英傑士俱埋土  
一丘衰草籠寒烟悲風涼颼颼達者悟此機挈  
壺且遨遊

迂疎惟愛酒此癖難語君但願杯中滿不慮身  
後貧興至罄幾斗醕酏常及旬白雲封我徑皎  
月照我門詩俚費賡韻酒濁賴葛巾身世如鴻

毛得失等浮雲萬物俱是幻千秋定誰真生爲  
旅邸客死作丘中塵殘碑卧蒿萊空勒金石文  
漠漠夜臺客汝今欲何云古來好酒客俱是放  
達人啣杯漫追歡豈限晝與昏

余身閒更逸此心寬且平賡詩追李白縱酒學  
劉伶一日六時醉十旬九不醒與酒爲莫逆處  
世忘其情年過六十外一事俱無成不作久長  
策且就短歌行卧甕畢吏部對菊陶淵明斯人

去已遠至今垂芳名

醉里一狂士貌古心愈瓌放浪山水間終日啣  
酒杯嘯歌成獨樂何羨登蓬萊但有五斗量而  
無七步才甘心茅茨下遺榮媿良媒抱璞不自  
獻日夕持酒迴吟哦代鼓瑟力倦忘舟楫對花  
佳興發向月好懷開絕跡煩惱境此身胡慮灾  
俠氣猶水雪壯心成寒灰生惟酷嗜酒性與世  
不諧命稟猶天賦榮枯任去來

落魄林下叟穩步爲軒車仰天發長嘯浩然振  
其鬚身處於丘壑中心斯無虞朱槿葺環堵衡  
門繩作樞無事足不出偃卧黃茅廬興來對樽  
酒三杯意自舒但謀酒中樂不求聞上都身安  
等榮達奚必藏隋珠功名若風絮何爲構華居  
朝爲萬民宰暮屬丘中夫一旦委蒿萊四壁空  
圖書智者能知止勿求黃金餘賢愚同朝露貴  
賤無等殊所以樂醉鄉生死終不踰滾滾風塵

道營營利祿途驅馳苦弗息物化將何如還輸  
放達者詩酒長自娛

春風吹綠草倏忽俱凋黃光景易遷邁觀之成  
感傷西麓沉皓魄東山昇太陽昇沉且暮間人  
事多相妨南里有富室倉廩儲稻粱北隣育年  
少猛勇若虎狼營營構籌策寸衷日遑遑暴虐  
有商紂荒淫謂吳王二君失脩德畢竟至殞亡  
但識杯中趣何計世短長惟事醉還醒此樂為

無量及時弗痛飲頃爾鬢毛蒼那管身後計且  
壘幾壺觴

置酒 八首

興欲延酒人置酒玄都觀柳條垂幾千桃花開  
一半狂蜂枝上忙浪蝶風前亂縱酒學陶潛登

樓賦王粲

右當置酒次晉陸機韻

昔聞金陵勝鳳凰集高臺乘興一追翫芳樽臺  
上開朋儕賞幽致策馬歡咲來鳳凰解人意此

日當旋迴興俠空世界歌狂動上台大呼壺中  
酒連吸三四壘二美知不易須當醉百杯荒丘  
俱六朝宮殿長莓苔達者宜行樂莫待白髮催  
右金陵鳳凰臺置酒次唐李白韻  
終南還已暮林鳥天外歸漫涉崎嶇徑雲閒新  
月微故人邀我宿竹下啟柴扉松陰復古道花  
氣襲人衣欣然憩石榻叙言杯酒揮但恨多離  
別良會世所稀嶺猿發長嘯江鷗任忘機

下終南山過斛斯山人宿置酒次  
唐李白韻

長溪瀉碧流林樹呈蒼翠畫舫載樽罍酒醇堪  
客醉鷗鷺泛迴瀾風景與世異蕩漾綠蘋洲盤  
桓芳草地丁丁谷口聲隱隱隨風至蘆汀鴻雁  
鳴烟渚瀟湘意應惜出群才泯蹤守一尉王君  
瀟洒情豈肯混塵事此日別緱岑北憩心方遂  
杯盞可留人晝永行還未離懷惜難罄俱成新  
賦議相期在朔晨晤對山僧寺

右緜氏尉沈興宋置酒南溪次唐  
王昌齡韻

開樽叙故知暢飲忘悲戚歲往豈復旋行止非  
復昔汨汨晨與昏誰能年至百曉起臨青鏡兩  
鬢蕭蕭白且追此夕歡休誇鴈奮翻籬下霜菊  
黃杯內瓊漿碧醉來掃俗塵一枕安神魄每羨  
瀟湘筠更喜南山栢

生與旨酒偕此心無戚戚對花擎芳樽味句追  
往昔常念我頽齡豈能至一百倏忽五旬餘頭

願將半白爲歡恨遲遲那羨黃鵠翻春風翫花  
柳秋月泛波碧狂歌暢心神醉飲飛魂魄且盡  
眼底歡休想墓栽栢

右置酒二首次唐李益  
韻

紅杏當春日黃花媚九秋相逢須縱飲沉醉可  
消憂山鳥供人耳清霜點客頭物情容易改歲  
月不羈留塵世杯三酌殘軀土一丘吾當解此  
意置酒故園遊

右故園置酒次唐劉希夷韻

置酒高堂上金盤熊掌肥嘉賓叙綺席繡閣出



娥眉玉管吹清調，聲悽思欲悲。朱絃和錦瑟，素  
指撥蘭猗。瓊漿瀉玉尊，永夜樂不涯。但惜年易  
邁，紅輪似矢移。身埋北邙下，金寶嘆何爲。智者  
生當醉，毋容後世嗤。

右置酒高堂次明解纒韻

今日良宴會次明林鴻韻

今日良宴會，樽酒樂須臾。憶昔同心侶，風霜苦  
道途。感茲列綺席，爲君擊唾壺。相逢尚寒素，眷  
焉復長吁。未得樹功業，髮白爲何如。

我有一樽酒次明王世貞韻

我有一樽酒，徜徉坐花下。問君何不來，明月復  
吞吐。翹首對青天，婆娑欲起舞。醪醕不知疲，吾  
心自太古。優游樽俎中，不爲浮名取。

述酒次晉陶潛韻

幽懷惟在酒，塵事性厭聞。三杯意始悅，一醉百  
憂分。幻身如掣電，澆世等浮雲。出郭閒登眺，愁  
見高低墳。宿鳥知景夕，窻鷄報曉晨。肯酒歡相

冷賦詩性自馴詩酒適爲樂聊以慰閒身藏名  
惟是拙把盞意甚勤陶然忘人我久以滌心君  
得失渾無定功名若蕝薰喜歌酒德頌不讀送  
窮文高懷愛籬菊野興泛河汾狂歌祛俗慮痛  
飲掃塵紛生平無所嗜頗爲樽酒親窮居甘貧  
賤敢與古人倫

四不如酒次唐白居易韻

秋水白如銀長江萬里直心縈千種愁江水滌

不得休採五色芝枉費辛勤力憂苦寸腸結靈  
丹醫不得兼金有萬鎰煌煌耀赤色囊橐雖充  
盈命傾一無得嬌姿動人歡晝夜情相逼雖有  
鋒利刃恩愛割不得水不能滌其愁芝不能開  
爵結金不能保延齡刃不能割歡悅不如吸盡  
三百盃千愁萬慮皆休歇

卯時酒次唐白居易韻

不必論醜醜何須歌沈瀟卯時飲一盃高懷加

十倍且罄尊前歡胡慮竭甕內瓊漿浣愁腸塵  
事忽相背不聞雷霆聲何知宇宙大優游樂醉  
鄉誰羨冠與帶踈散類嵇生風流擬晉代高蹈  
每絕群煩言任瑣碎酣歌恣我狂落魄由人怪  
猛省總角時倏忽五十載醉倒草爲茵瑤天爲  
覆蓋遺世日逍遙形骸寄蟬蛻寵辱俱相忘此  
心無雜礙蹤跡遠塵囂意氣超雲外領略造化  
功玄微自能會靈臺湛虛明坎離乃交泰醅酌

黑甜餘此樂應無對

人言我嗜酒次明許繼韻

人言我嗜酒嗜此何爲哉半酣適我興一醉輕  
塵埃莫教長戚戚對此好懷開君無李白盞我  
乏劉伶杯浮白勝獨醒那得紅塵來清歌發長  
嘯明月臨高臺

嘗新酒次唐白居易韻

厨頭報酒熟嘗之已得醉模糊倒石床不覺成

軒睡高枕北窓下悠然得安寐醒来看落花鋪  
通庭前地斜日掛松嶺林靜無塵事拂几理瑤  
琴一曲澄幽思

晚春沽酒次唐白居易韻

好花頃爾落綠鬢忽成絲人衰無復少花落有  
關時愚者俟榮達榮達來何遲何如安爾命不  
必感雙眉貸錢可買笑沽酒堪典衣時尋二三  
侶弗醉莫言歸對景情更逸追歡與未衰壚頭

日潦倒醅酊不知誰

把酒次唐白居易韻

達者常惺惺有生終有死堪哂世上人百憂無  
一喜富貴本在天豈能恃在已弗解把酒歡驅  
馳至於此但得滿芳樽何須羨榮仕座中一點  
紅不必身衣紫日醉好韶光落魄終歲紀花枝  
戴角巾肯酒漱皓齒兩眼任模糊渾忘我與爾  
欲盡此宵歡五斗斯足矣塵世浮漚空幻身萍

梗似荷鍾傲劉伶乘風學列子

對酒 三首

達人契酒杯春去寧復來名花如綺繡爲問幾  
時開花開宜翫賞酒熟應滿壘及時貴行樂莫  
待霜雪催蒿萊迷漢苑鹿豕遊楚臺秦宮與魏  
關荒蕪混塵埃興廢總如此不飲徒嗟哉 次李  
白韻  
靜計一歲中爲樂能幾日古來七十稀人世百  
難一不思生有期奔忙至日沒寒烟凝衰草黃

土埋白骨參透此玄機何必學丹術興至賦新  
詩狂來肆揮筆對酒却成歡陶然忘痼疾嗤彼  
塵寰人全不知得失何肯傾壺觴惟惜囊裏物  
悞罹羅網中欲脫無計出豈若陶淵明籬畔醉  
兀兀 右次唐白居易韻  
遇花增我興把酒不能捨請看浮世上俱耽利  
名者碌碌百歲中畢竟埋荒野

惟知利祿榮却將令德捨請觀宇宙間幾見百

歲者王孫與貴戚終當壑曠野

右次唐曹鄴韻

花下對酒四首次唐白居易韻

江南陽早回春至逢臈月茶花開滿庭芳梅枝  
上發碧葉襯紅椒綠萼映皓雪無奈朔風吹何  
妨俗子折林中一散人鬢鬆兩鬢髮對花把一  
盃弗負此佳節闔戶成山林門外轍迹絕蒼頭  
解我懷衾枕榻上設

芳梅報早春幽鳥啼嘉月壚頭酒正馨狂夫興

始發盃中盈綠醕梅花欺白雪對景樂良辰毋  
容手攀折五斗暢詩腸一枝簪皓髮清思紀新  
吟高懷賞令節醅醕心始閒頃爾萬緣絕漫語  
膝前兒藜床傍窻設

山花與林杏飄颺若飛霰日行如擲梭月沒疾  
於箭綠鬢染清霜朱顏忽更變看花開好懷把  
盞情愈健沉酒樽筍中一任世輕賤三盃暢我  
懷春風生滿面試問泉下人一去何由見逢時

宜翫賞遇酒胡須勸

感折枝上花亂落如紅霰白日疾奔駛韶華去  
似箭時序頃更遷滄海桑田變四體覺頽然何  
能得久健不思有限身惟愁貧與賤雙眉感終  
朝憂色形于面曉來臨青銅衰癯豈忍見且罄  
壺中漿自斟還自勸

對琴酒次唐白居易韻

獨坐東軒下好月照我帷開樽傾宿釀把袂對

芳時微醺興已發拂几撫金徽一曲梅花調幽  
情喜相依叢枝壓白雪清影浸方池操罷懷自  
愜綠醕復進之鼓琴復酌酒嗜者世應稀伯倫  
與子期神契爲相知

小酌二首次明王謳韻

西隣多逸興索我倒清樽落葉滿幽砌寒花盈  
故園燭影舞裙亂月光歌袖翻樂矣還共酌瀟  
然相對言醅醕欲歸去長揖向衡門

小飲傍花塢四徑來天光對酒待明月明月照  
茅堂有客勸我飲清歌促羽觴媿非陶淵明爛  
醉東籬傍百年聊自適何用多感傷

小飲次明王謳韻

素性愛寥廓幽居避囂喧興至即小飲臨軒試  
開樽形骸獨放浪微酣捲忘言三徑有松菊能  
不懷故園考槃既云樂無乃道自尊春風招獵  
鶴翛然卧衡門一室紫氣封石鼎火尚温奚論

醒與醉逍遙樂乾坤

法華寺西亭夜飲次唐柳宗元韻

邀我酌西亭醍醐勝昔酒劇飲已模糊禪燈照  
孤牖山僧喚不醒殷勤重搔首

春日獨酌 四首

春風吹麗景花草映晴暉幽禽鳴碧樹浪蝶繞  
枝飛遠哉陶五柳三月棄官歸吾亦無外慕詩  
酒日相依興來持壺觴獨酌對芬菲



欲遺塵世想開樽坐花間三杯愁可却一醉情  
始闌高歌郢中調醉眼看青山興至臨泉石薄  
暮不知還憑誰云至樂豈若醜其顏

右次唐  
李白韻

携樽當春日獨酌臨暄風有酒且盡醉何用悲  
飄紅壺觴足平生閒心喜相托莫問春與秋縱  
飲情落落誰爲百年身中多憂與譁

床頭五斗酒不知醉何人對花自斟酌奚須  
陽春雖非荷鍾流囊空未爲貧酒中有佳趣灑

落含天真

右次明姚綬韻

獨酌

三首

春光遍郊陌携壺坐花陰晴日空中度花影衣  
上侵悠然成獨酌長嘯徹高林醉來情更逸把  
盞對花吟醅酌眠芳草醜顏枕瑤琴渾忘在宇

宙熙熙太古心

右次唐李白韻

功名信已杳不作籠中鳥放浪山水間狂歌學  
年少獨酌何辭夜孤月輝光照長嘯一聲清自

覺軋坤小

右次唐杜牧韻

獨酌不待時酣歌歡不已把盞對明月無憂亦  
何喜飲我綠尊酒彈我綠綺琴醉來便高卧舉  
世誰知音

右次明姚綬韻

月下獨酌四首次唐李白韻

迂拙無他好惟與杯酒親月下臨花坐借花爲  
主人香氣襲我衣清影覆我身行樂弗及時辜  
負此芳春獨酌謾盤桓毋令至生亂任教玉漏

催與高未云散山月暢幽懷清光滿霄漢

開樽花下坐獨酌明月天綠蟻浮杯中甘冽如  
醴泉興狂壺已罄醑酊不知天竹林嵇阮輩至  
今頌其賢暢飲李太白由來呼謫仙景仰高風  
致意氣斯同然日夕成清賞無心冀後傳

烟暖柳如金風恬花似錦看花坐柳邊興至猖  
狂飲貴賤與否泰由來自天稟不惜醉芳春生  
死誰能審陶然明月下卷石堪爲枕任人呼我

顛誰知我樂甚

黃金盈百鎰何如酒滿杯  
撫景當劇飲清風林  
間來明月豈常好奇花  
幾度開年華嗟易邁逝  
水不復回紛忙且與暮  
富貴何爲哉精靈至物  
化枯骨伴蒿萊且傾一  
樽酒優游歌月臺

待酒不至

二首

綠鬢易成絲縱飲猶云遲  
待酒何不至恐悞芳  
春時酒至就花酌好鳥  
鳴在茲鳥音與高懷二

者欣得宜

右次唐李白韻

興來飲沽酒沽酒前村遠  
遙望酒旂青長林更  
宛轉酒至直須飲酣歌  
對名花花與酒相洽春  
風思無涯

右次明姚綬韻

嘲王歷陽不肯飲酒次唐李白韻

家無儋石儲酒杯常在手  
却咲王歷陽胡爲不  
飲酒室中空壺觴苑內  
閒花柳一朝朱顏頹黃  
金徒自有

對酒自勉次唐白居易韻

今年五十五老至動悲思髮白興猶在家貧志  
未卑追歡還勝昔對酒却嫌遲且傾三五竿草  
就幾篇詩謾美桓伊笛高歌元亮詞晝閒卯上  
飲夜醉月明時

勸醉次唐白居易韻

人生薤上露富貴眼前花壽命知有限世事苦  
無涯何須學參禪不必誦楞伽金丹亦孟浪奚

用煉朱砂樂地追歡少寸衷愁更多紛忙驅白  
日清夜發長嗟造物固有定不能損與加弗如  
對樽酒一盞情始和二盞興方至鼓掌發浩歌  
酩酊忘憂樂模糊知有他睜目覩醒者誰識風  
與波智人解得失不受塵網羅愚生但嗜酒大  
醉能幾何

飲後戲云幼子次唐白居易韻

生年五十餘逃膝皆稚子欲渠通古今弱齡何

能爾旦暮誨勤劬未解吾且止但修方寸間賢  
愚無論矣祛却心上愁開樽情更喜味能適我  
口何必希甘旨如欲求過分後世恐遺耻惟願  
實其腹烏用悅耳目人豈能久長百歲終歸死  
得失由天命塵世皆如此且罄眼前杯醕酌扶  
不起

春日醉起言志

二首

浮生渾似夢塵世胡勞生日酣數斗酒潦倒花

前楹醒來猶喚酒幽禽枝上鳴兒童問誰鳥啼  
春啼流鶯嬌聲如絃管美酒復滿傾鳥聲與花  
色相對捲留情

右次唐李白韻

逢春不醉酒問爾將何如肢體皆電幻功名總  
成虛俛仰天地間大化有乘除覩此增感慨奚  
必論卷舒傷哉百年內何事空嗟吁

右次明姚綬韻

秋夜醉起言志三首次明黃省曾韻

稗草能結實寒蛩知候鳴遙天一輪月出沒何

虧盈吾生不荷擔亦不親歷耕遁迹荒墟裏喜  
不事戎征但得契詩酒胡須播姓名

久懷出塵想何人復追尋明月如有待相將坐  
更深輝光朗如晝拂几鳴瑤琴宮商調玉指清  
越驚栖禽悠悠我情暢堪惜誰知音

遙空淨如水爛然霞綵張舒卷恒在我攬衣坐  
中堂悠悠北窓下清風傲羲皇對酒且痛飲月  
色何蒼蒼晨鷄已三唱東方忽生光吟哦暢所

志那惜奕葉芳嗤彼千載名徒勞身後揚

醉起偶書次明馮世雍韻

性逸無物累狂歌一何豪折腰輕五斗歸去淵  
明高不跨揚州鶴那釣滄海鰲跨鶴無還丹涉  
海多風濤耽此杯酒癖疎懶甘布袍四子遺清  
白一妻樂糠糲放浪宇宙間雙鬢任蕭騷我醉  
本獨樂安知世人勞

醉後次唐韓愈韻

天上星斗橫芳筵客已醉狂來遂忘疲鼓舞如  
兒戲牽衣拭酒痕捉筆書文字博取日日歡田  
園爲誰置

擬庾亮乞酒 九首

雪飄千嶺玉風撼使人愁鳥雀寒難息飛泉凍  
不流俚詞乞故友佳釀熟新秋遣贈君能否酣  
然感故侯

右就蒲州使君乞酒

眷戀故人意樽貽琥珀紅歡顏傾碧竿雅興對

清風還堪酣阮藉不及醉王戎獨酌空庭裏  
光映酒中

右荅王司馬餉酒

金波仙子贈酌我足生平把盞情還暢開樽思  
欲驚狂飈林外吼雜霰牖間鳴醉卧重幃裡毋  
勞問寒榮

右奉荅賜酒

感爾餽鵝酒清醇愜我心籬畔花初綻天邊日  
欲沉酒縱生群樂情閒抵萬金一詩堪擬謝醉  
我在山林

右奉荅賜鵝酒

貽酒故人意杯中泛紫霞興狂歌白雪情逸對  
黃花繁蓼開寒渚閒鷗集晚沙陶然壺欲罄歸  
去步歌斜

右衛王贈桑落酒奉答

籬綻淵明菊詩成杜甫才深秋却紈扇良夜倒  
金杯坐久風生榻歌殘月滿臺從教玉漏促浮  
白且徘徊

右聘齋秋晚館中飲酒

新歲開家宴兒童捧玉杯屠蘇清更冽楊柳綠  
初迴簫鼓尊前奏梅花枝上開隣翁稱賀首歡

咲入扉來

右正旦蒙齋酒

明月滿花臺蒲州信不迴未貽玉液至寧得好  
懷開山堂候吏下鴈足寄書催千日徒云醉中  
山何得來

右蒲州刺史中山公許乞酒一車未送

瓊漿降玉臺春色遍蒿萊稚子歡迎賜騷人罄  
珀杯黃花籬畔綻綠蟻甕中開叔夜慇懃勸山  
濤倒屣來尊前共歡飲酪酊坐高臺

右蒙賜酒

携酒訪友次明張時徹韻



花前一樽酒持此尋幽棲主人閉蓬戶垂綸坐  
漁磯相見遂拂袖高歌興不違觴咏醉浮白恍  
若聚瑤池何必兄弟儔臨風奏埙篪快哉獨稱  
樂吐盡胸中霓五斗情易足百年信難期歡賞  
情未已明蟾掛高枝握手暢所志酩酊却忘歸  
俯仰無愧作搔首將何爲

夏日携尊過叙次明俞淵韻

渴來畏煩熱聊汲山中泉茗盃與尊俎嗜此性

獨偏相携一觴至酌我草堂前高樹垂清蔭薰  
風度遙天避跡頗云樂奚必相摩肩酩酊竹林  
下何須醉華筵既醉復已醒起坐細談玄考槃  
方在磻獵鶴時盤旋白雪起清歌高山奏緝絃  
久矣不知暑相逢自年年肥遁獨遺世安用悲  
臨淵淥硤既已非無乃作者賢清行良不虧藐  
哉予得全飲者恒自適酣歌抱琴眠放浪無物  
累二仲相迴還

灌夫使酒次明沈周韻

性本傲凡俗咄哉耻奴顏落魄固不羈俠氣盈  
臆間醉來仰天嘯慷慨更何難力能拔虎尾當  
不思生還一劍欲報仇怒目未常歡奮勇死不  
避安能免摧殘堪嗟父母軀遂爲狂藥嘆

止酒

三首

余素惟與歡伯麴生以爲莫逆且暮相  
親山妻稚子每以緩言拒飲欲余永

齡非獨止酒萬事至此俱欲蠲之

逃名止華岳誅茅可居止踞止蒼松陰行止古  
洞裏盤飧止蕨薇悅止挈幻子情性懶止酒止  
酒心勿喜卧止玉漏聲旦止紅日起餘事能止  
時衛生止道理但聞止不欣焉審止爲已知止  
靜能安故止曰得矣只今止以行豈止於涯涘  
壽考止千齡德止後世祀

右次晉陶潛韻

旨酒不及亂微酣適可止古人藉此歡高情述

卷裏今我全不飲恍似一俗子小酌取舒懷戒  
飲心何喜興和昔賢題巧句醉中起仗此暢幽  
悰沉酒則失理當知衛生方鄙戒皆爲已三杯  
釋萬愁五盞願足矣携樽登東山載酒遊西涘  
生前醉壺觴還勝身後祀

右次明李東陽韻

人生何戒飲飲者恐至醜嗟予本衰朽醜顏或  
微溻奚必傾幾斗三杯得真趣狂者不知幾沉  
酒亦何懼慚非畢吏部吾獨安其遇

次明錢  
百川韻

### 斷酒次明俞涓韻

結社傍東林遠公惟禁酒嗟彼紅塵中沉酣不  
知咎大化運鴻鈞物物更何有庶幾還獨醒方  
能滌煩垢身遠酒泉郡醴酒不入口個中最玄  
微天地皆芻狗

### 醒後二首次唐劉駕韻

酒酣藉草卧酒醒客散後殘日半啣山應知客  
去久猶憶夢中時與客相携手

共客對芳樽不覺至更後模糊倒花下席間人  
散久醒來興未頽持盃莫停手

北窓三友次唐白居易韻

徐徐北風至臨窓一無爲陶然樂其志思曠知  
有誰且斟一盃酒漫歌陶韋詩詩酒可感興興  
至忘其時遁迹少言過寡欲惜體肢適有臨池  
趣揮毫似獻之癖性匪我獨昔賢亦如斯縱酒  
嵇叔夜耽詩沈佺期三者頗自樂唐晉皆可師

簞食不爲耻綠荷是紉衣閒身結三友詩酒字  
同歸情懷欲希古且暮苦相追歌輟卽酣飲酒  
闌筆硯隨三友日淡洽言行期慎徽狂來任疎  
散誕慢歌一詞但可悅所志不堪朋舊知賦性  
本愚拙任彼嗤是非

自古無長生勸姚合次唐劉又韻

昨見枝上花今朝少顏色嗤彼不內省忍見雙  
鬢白老至一無能誰爲爾戚戚筋力費一生心

神遊八極但將利祿珍胡爲處身窄此語雖諄  
諄此情徒脉脉自古無長生難守百年宅生前  
重金寶死後任狼籍

酒瓢詠次唐張說韻

瓢古堪盛酒酒清眉髮映蝸深堪作杯頸長遂  
爲柄心虛素且朴質脆潤而勁小大自天成取  
捨從人性

七言古

勸酒二首

踏春郊外拖雙屐古塚纍纍少人跡叢叢荆棘  
混蒿萊哀烏夜夜啼松栢黃土惟留衰草痕下  
有偉績英雄客寒暄日暮歌鐘起殘碑剝落蒼  
苔蝕聲華今古摠成空不如飲酒爲上策

幾樹桃花間柳枝參差紅綠夾隋堤輕盈飛燕  
呈嬌舞美麗吳姬勸酒卮拂拂香風飄錦袖溶  
溶明月照蛾眉猖狂金谷園中樂酩酊花間枕

習池風流俠客歌新調落魄騷人倒接離寄語  
尊前年少客問誰能訂百年期殷勤且罄杯中  
物須信人生有別離

自勸次唐白居易韻

疎梅幾樹間叢竹曲曲清溪環矮屋頽垣宛轉  
碧蘿垂石徑森森蔭古木芳春折柳每携筇良  
夜看花須秉燭甘隨鹿豕樂餘年豈羨人間利  
與祿清風入座吹我裾明月穿窻伴人宿不求

塵世識姓名老我山林恒自足閒心終日樂陶  
陶蠻觸馳驅任囚獄

中秋獨酌次明姚惟芹韻

良宵對酒情何許仰看嫦娥更何事然浮白  
坐中庭此身如寄瞻宮裏何當風裡落花歌  
舞樓前笛聲起丹桂叢叢飄暗香一枝纖手誰  
傳與醉來鼓掌發長嘯明月清輝浮海宇

捧觴吟次明馮世雍韻

江天日落烏欲棲吳姬行酒浮玻璃蘭陵味濃  
琥珀色落花入座雲光迷主人歡咲客未醉青  
天落落明蟾低但願生前對尊酒痛飲竟夕聽  
晨雞

常林歡次明張寧韻

林頭酒熟鬱金香激灑金樽琥珀光常林開宴  
客俱往歡忤誰作江湖長乘興銜盃直待曉相  
逢酪酊情懷好高歌爭愛綠水曲步履歌斜歸

故道

新豐主人次唐儲光義韻

我來新豈酒初熟主人留我山齋宿對月開樽  
盡與嘗一曲高歌代絲竹歌聲嘹唳亦可人不  
羨青樓瑟與箏大醉模糊不省事翻身旭日上

高城

金陵酒肆留別次唐李白韻

甕頭酒熟發馨香客子登程取次嘗三疊陽關

歌未徹勸君更進幾壺觴  
俄驚殘照下林麓  
應惜浮生不久長

醉語聯句次唐顏真卿韻

我儕日日圖酩酊  
日上三竿猶未醒  
人間萬事俱不領  
一任人喚伯倫並

螺冠子酒詠

終

